

東

華

錄

東華錄

康熙二十四

臣王先謙敬編

臣周澗蕃恭校

秋七月甲午河道總督靳輔奏淮河東岸自翟家壩至周橋閘乃淮揚運河上游門戶山鹽等七州縣民生關鍵也當黃河循禹故道之時淮流安瀾直下此地未聞水患迨黃流南徙奪淮淮流不能暢注於是壅遏四漫山陽寶應高郵江都四州縣河西低窪之區盡成澤國者六百餘年矣明萬曆初河道廢壞雖不若今日之甚而清口淤高堰決與今日情形相似彼時河臣潘季馴築隄堵口治效班班可考然此處不議加高蓋明代祖陵在西故停河東之障以洩水殊不知如慮淮漲西侵何難兩岸並築而願留患門庭歷年既久遂致成河九道使淮揚疊受水災臣不能不憾潘季

馴以善治河稱而亦有此失者也 皇上軫念運道民生大發帑

金命臣徧爲修治今翟家壩成河九道之處計共寬一千三百二

十三丈二尺今已合龍更查山陽寶應高郵江都四州縣河西諸

湖亦逐漸涸出擬設法招墾庶幾增賦足民下部知之○乙未以

索爾遜爲甘肅按察使由郎中遷○吏部等衙門議奏殉難首領佐貳

等六品七品官之子以縣丞錄用八品九品官之子以縣主簿錄

用未入流之子以州吏目錄用著爲例從之○予殉難江西廣昌

縣巡檢舒學文官廕○戊戌征南將軍都統穆占奏招撫僞總兵

路奇遇等文武各官共一百七十九員下部議敘○己亥撫蠻滅

寇將軍廣西巡撫傅宏烈奏奉頒招撫敕諭當卽會同平南王尙

之信委僉事職銜王繩武通判職銜俞音齋往吳世琮營被害應

賜恩卹從之○庚子戶部郎中布魯等奉差浙江巡海 上諭之

曰浙江沿海地方關繫緊要爾等前往詳察設立巡海官兵如額兵單弱卽酌議增設至於奸惡兵民販賣糧米因內地利少出海利多冒死越界勾連貿易者有之欲滅海寇必斷內地私販爾等宜加巡察如將軍督撫提鎮所屬人員有犯禁者卽鞠審以聞務期不時訪緝杜絕往來販賣庶奸宄屏迹海氛可靖矣○辛丑以科爾坤爲左副都御史由大理寺卿遷金鎮爲江蘇按察使由分巡江蘇道遷○

癸卯諭刑部向來死罪重犯因有論功免死之例以致惡人希圖倖免臨陣退縮殺人劫財恣肆愈多以後死罪人犯不得論功議免著照其應得之罪議擬具題候旨定奪○平南王尙之信奏臣先因患痔由橫州還封川今病日加有事醫療故臣於六月十八日還會城 上諭今正進討逆賊剿撫並施之會尙之信所部往定廣西官兵令學士孔郭岱等盡率赴將軍莽依圖軍前聽莽依

圖統攝調遣孔郭岱等卽同莽依圖進剿其奮武大將軍印敕仍留於尙之信○丙午先是輔國公溫齊等圍困岳州時賊遁不追且妄報殺賊之數上令嚴取供詞以聞至是大將軍貝勒察尼等取供具奏上諭我國家由來軍法嚴明會無虛僞多報首功之事溫齊乃有罪之人不思效力自贖岳州徒步奔逸之寇不卽窮追且殺賊不過三百餘人與原奏迥異彼時一等台吉格勒爾圖尙欲追剿賊寇乘勝復城乃溫齊反稱道隘馬疲不可前進選愞退怯大誤軍機可削去溫齊公爵罷其參贊署副都統達賴削去阿思哈尼哈番佐領及所加之級喀住削去副都統麻尼削去護軍參領佐領及所加之級○定遠平寇大將軍安親王岳樂奏招撫僞知府金世正等二百八十六員下部議敘○宣義將軍尙之孝奏招撫僞總兵林興隆等二十員僞兵六千五百一十二名

下部議敘○丁未純親王隆禧疾篤 上親詣王第視之立傳醫

調治午時還宮以王疾奏聞 太皇太后 上復詣王第視之以

王疾篤還奏 太皇太后申時王薨 上聞赴痛悼傳諭輟朝三

日隨以王赴奏聞 太皇太后驚慟欲親臨其喪 上奏曰 太

皇太后痛念亡孫洵屬至情但恐 聖體萬一勞頓深爲未便再

三勸諫方止 上欲詣王弔復奉 太皇太后諭曰爾日親萬幾

若再悲哀則爾身益瘁可勿往 上敬遵 慈諭遂留 太皇太

后宮中勸慰竟夕未還宮○定遠平寇大將軍安親王岳樂奏招

撫僞總兵王熙忠等十二員兵丁二千名下部議敘○己酉 上

臨純親王隆禧第舉哀○辛亥定遠平寇大將軍安親王岳樂奏

六月初七日漢軍都統釋迦保等於寶慶府巖溪大敗逆賊僞楊

總兵斬首七百餘級獲賊船四十餘艘下部議敘又奏漢軍都統

釋迦保招撫偽副將陳起鳳偽知縣廖新等及兵丁五百名下部議敘○壬子遣官祭純親王隆禧命發帑派內務府官監修墳塋立碑加祭一次○建義將軍侯林興珠奏投誠偽總兵王度冲偽將軍陳珀標兵各一千人見留軍前其父母妻子俱在雲南恐乘間逸去宣洩軍情請調內地補伍 上諭投誠官兵見隨大兵進剿若盡撤往內地則此後歸誠者將瞻顧不前大將軍貝勒察尼等身在常德洞悉情形其有家口在滇實屬可疑者酌量設法撤至內地補入營伍○癸丑甯南靖寇大將軍順承郡王勒爾錦等奏湖南各大將軍麾下所有蒙古兵已盡遣還其在彝陵襄陽等處蒙古兵一千七百餘人亦應撤回京師得旨彝陵襄陽諸處蒙古兵准令撤回於荊州諸處滿洲綠旗官兵內酌量抽撥鎮守地方○甲寅湖廣提督徐治都奏設五板船一百艘令彝陵鎮臣胡

世英統之以備水路臣親調官兵偕襄陽鎮臣水陸並發前赴歸州興安巴東形勝之地剿撫逆賊得旨所用戰艦督撫等委官速造毋誤軍需徐治都卽偕彝陵襄陽總兵官赴歸州諸處討賊剿撫並用速奏膚功○乙卯兵部議奏外委千總魏士會齎札往招僞將軍吳應麒被殺應贈千總廕子弟一人以衛千總用得旨著加贈守備○鎮南將軍莽依圖奏僞將軍吳世琮等圍南甯日久城中食盡旦夕且陷投誠馬承廕請救總督金光祖遣總兵官譚昇揚國泰等率兵往南甯援之吳世琮率眾渡江越嶺於新村西山之巔列鹿角逆戰臣與將軍覺羅舒額楚都統勒貝等分路撲剿殺賊甚多吳世琮負重傷遁遂解南甯之圍又太平僞知府林輔世新泰僞參將何應魁率城內文武官投誠得旨嘉獎下部議敘○丙辰江西提督許貞奏玉山常山德興一帶地方逆賊僞

英義將軍程碧於五月二十三日被臣標守備鄭武等所擒下部
議敘○丁巳撫遠大將軍都統大學士公圖海奏益門鎮逆賊既
敗卽遣兵追勦而賊毀偏橋無路可通俟提督孫思克趙良棟到
日會議進兵得旨逆賊既敗所在震動自宜努力窮追收復疆土
前稱逆賊屯踞寶雞圖海等欲調各路之兵進勦及賊敗之後又
不乘機撲滅反藉稱賊毀偏橋無路可通竟爾卻還如此懦弱易
退何時乃得破賊圖海等速調提督孫思克趙良棟等平定漢中
四川諸處勦殺逆賊毋失機會○鎮南將軍莽依圖奏南甯地方
險隘輓運維艱議令將軍額楚都統馬九玉帥兵屯駐永淳上
諭今當賊逆震驚搖動之時凡爲將帥者各宜不失機會努力疾
行滅賊以定疆圉莽依圖等旣大敗南甯逆賊吳世琮等自當乘
勢直取雲南乃稱南甯險隘輓運艱難令額楚等往駐永淳懦弱

如此逆賊何時得滅滇南何日得平今粵西底定乘賊大敗之後
莽依圖等速調都統希佛等兵自南甯取路進剿直抵滇中○戊
午發漕米五萬帑銀二萬賑山東沂州等十三州縣饑○庚申京
師地震詔臣工修省在京部院三品以上官及科道在外督撫等
言政治得失○辛酉諭戶工二部軍民廬舍傾圮及死傷者著發
帑銀十萬兩酌量賑卹○壬戌集廷臣於左翼門遣侍衛費燿色
齋諭旨仍口傳 上諭曰頃者地震示警實因一切政事不協天
心故召此災變在朕固宜受譴爾諸臣亦無所辭責然朕不敢諉
過臣下惟有力圖修省以冀消弭茲朕於宮中勤思召災之由力
求弭災之道約舉大端凡有六事爾等其詳議舉行勿仍以空文
塞責傳諭畢宣讀 上諭曰朕薄德寡識愆尤實多邁此地震大
變中夜撫膺自思如臨深淵兢惕悚惶益加修省朕意中素有數

事使爾諸大臣總督巡撫司道有司各官咸其聞知務期洗心滌慮實意爲國爲民斯於國家有所裨益卽爾等亦並受其福庶幾天和可致若乃虛文掩飾致負朕意詢訪得實決不爲爾等姑容也一生民困苦已極大臣長吏之家日益富饒民間情形雖未昭著近因家無衣食將子女入京賤鬻者不可勝數非其明驗乎此皆地方官吏諂媚上官苛派百姓總督巡撫司道又轉而饋送在京大臣以天生有限之物力民間易盡之脂膏盡歸貪吏私囊小民愁怨之氣上干天和以致召水旱日食星變地震泉涸之異一大臣朋比徇私者甚多每遇會推選用時皆舉其平素往來交好之人但云辦事有能並不問其操守清正如此而謂不上干天和者未之有也一用兵地方諸王將軍大臣於攻城克敵之時不思安民定難以立功名但志在肥己多掠占小民子女或借名通賊

將良民廬舍焚毀子女俘獲財物攘取名雖救民於水火實則陷民於水火之中也如此有不上天和者乎一外官於民生疾苦不使上聞朝廷一切爲民詔旨亦不使下達雖遇水旱災荒奏聞部覆或則蠲免錢糧分數或則給發銀米賑濟皆地方官吏苟且侵漁捏報虛數以致百姓不沾實惠是使窮民而益窮也如此有不上天和者乎一大小問刑官員將刑獄供招不行速結使良民久羈囹圄改造口供草率定案證據無憑枉作人罪其間又有衙門蠹役恐嚇索詐致一事而破數家之產如此有不上天和者乎一包衣下人及諸王貝勒大臣家人侵占小民生理所在指稱名色以罔市利于預詞訟肆行非法有司不敢犯其鋒反行賄賂甚且身爲奴僕而鮮衣良馬遠勝仕宦之人如此則貴賤倒置所關非細以上數條事雖異而原則同總之大臣廉則督撫有所

畏憚不敢枉法以行私督撫清正則屬下官吏操守自潔雖有一二不肖有司亦必改心易慮不致大爲民害此事朕非不素知但以正在用兵之際每示寬容今上天屢垂警戒敢不昭布朕心嚴行戒飭以勉思共回天意作何立法嚴禁務期盡除積弊著九卿詹事科道會同詳議以聞○是月免山東新泰雹災長山等縣旱災額賦

入月癸亥朔諭議政王大臣等攻擊海賊營壘宜用火礮內造西洋礮甚利且輕便易運可令湖廣巡撫張朝珍以湖廣所有西洋礮二十具委官遞送福建總督姚啟聖軍前用資剿禦○福建總督姚啟聖奏海逆鄭錦以臺灣爲巢穴志必不降斷不可遣人招撫其僞武平侯劉國軒乃賊中渠帥頗能用兵請赦其前罪授以公爵僞將軍吳淑本無反志由部將迫脅請赦其前罪授以侯爵

主僞總兵陳昌林陞江欽吳潛均請畀以總兵官實授管事此數人若解體投誠則鄭錦勢孤海寇根株立可芟滅 上諭凡逆賊有率眾來歸及獻城納款者必俟投至之日方論功議敘豈有未經投順先爵以公侯之理劉國軒等果輸誠立效率眾來歸當赦其前罪仍行論功該督可遣人以此意往諭之○先是總督姚啟聖奏平南將軍賴塔久鎮潮州兵民俱已心服今在漳州宜令兼轄潮州 上允之命賴塔兼轄潮州至是賴塔奏臣身在漳州與賊對壘且滿洲大兵係大將軍康親王傑書統轄潮州地處遙遠實難兼轄 上諭成命已頒仍令將軍賴塔兼轄潮州如須用滿洲大兵許一面酌量調遣一面申報大將軍康親王○先是海澄公黃芳泰題請暫駐汀州爲其殉難兄黃芳度營葬至是總督姚啟聖奏汀漳二郡多有冒稱海澄公家人者卽有奸宄有司不敢

問且僞將軍吳淑吳潛等會害黃芳度因黃芳泰在汀不敢來漳歸順黃芳泰不宜久留汀州 上命黃芳泰攜家赴京師○甲子撫蠻滅寇將軍廣西巡撫傅宏烈奏賊范齊韓踞柳城融縣窺伺桂柳接應南甯臣檄永甯遊擊鄧林才會合馬承蔭兵協剿擒斬甚眾恢復柳城融縣二縣桂柳路通得旨嘉獎下部議敘○己巳定遠平寇大將軍安親王岳樂奏臣等率兵自寶慶起行七月二十日抵紫陽河見對岸有賊營令建義將軍侯林興珠提督趙國祚副將尼滿率兵渡河進擊鑲黃旗署護軍統領瓦代提標遊擊牛鳳翔渡河繞出賊營後夾擊賊棄營遁追殺賊二百餘人生擒僞都司一名下部議敘○庚午原任廣西提督馬雄之子馬承蔭奏請效力贖罪 上諭議政王大臣等馬承蔭不忘國恩誠心率眾齎繳僞敕印投誠可嘉應投馬承蔭伯爵給與將軍敕印隨大

兵進剿其標下應設官兵等處令理事官麻勒吉等與總督金光

祖同馬承廕確議以聞其餘兵丁有願歸農者安插得所願爲兵

者選撥入伍至同來歸附文武官員酌量給劄以示鼓勵○辛未

以施維翰爲山東巡撫由左副都御史遷○癸酉轉趙璟爲工部左侍郎

以張問政爲工部右侍郎由通政使遷○福建巡撫吳興祚奏招撫僞

總兵蔡冲璫等三員僞官八十五員兵丁一萬二千五百一十七

名招回島民三千一百九十餘名共獲大小船六十七隻分撥水

師營用下部議敘○甲戌諭吏部等衙門凡爲臣子者同寅協恭

自古皆然今各部院辦理事務大小漢官凡事推諉滿官事之得

當則歸功於己如事失宜則卸過於人至於入署不待事畢諉於

滿官止圖早歸宴會遊嬉不爲國家盡力擔當料理公務自此以

後各宜協力同心務盡厥職不可仍前推諉至科道各官平日章

奏內將一二可行之事隱附私情希圖作弊凡有條議鮮非無因閱覽奏疏多以己爲至公至廉其屬託公事肆行妄爲外播威勢挾制多端地方督撫等官莫不畏懼小民困苦未必不由於此作何懲戒著九卿詹事科道詳議具奏尋九卿等議覆嗣後漢官推諉滿官瞻徇延挨者革職科道條奏有屬託挾制等弊者革職拏問至大臣科道官員原籍子弟有挾勢妄行者照律處分父兄不約束督撫不題參者皆革職從之○九卿議覆給事中李宗孔奏一江西總督董衛國不能料理政務致失民心浙江巡撫陳秉直察吏無能賢否溷淆俱應解任一良民男婦子女身陷賊營官兵敗賊後應令親屬認識酌量給價取贖一大計停止已經六年應行令各省督撫於文到一月內將所屬官員秉公舉劾如舉劾不當將督撫藩臬等官從重處分俱應如所請得旨董衛國著留任

軍前戴罪圖功陳秉直著解任餘依議○乙亥鎮南將軍莽依圖
奏當逆賊圍困南甯時郭義齊人龍悉力固守數與賊戰非他處
投誠者可比今聞左江總兵官缺員以湖北總兵官傅魁調補儻
念邊疆要地乞以郭義或齊人龍補授茲缺用開歸誠之路 上

諭郭義原係左江總兵官率眾歸誠勤勞昭著仍復原任齊人龍
亦有勞績如有應補之缺聽該將軍題補其湖北總兵官員缺尙
未補人令傅魁仍回原任○奉命大將軍康親王傑書奏僞總兵
楊彩黃柏僞水師三鎮總兵吳定方僞副將陳化甲等各率僞官
兵丁投誠下部議敘○兵部議奏投誠吳應昌係逆賊吳三桂之
姪不便留在廣西應令將軍傅宏烈撥發官兵沿途護送來京得
旨吳應昌係賊親支傾心投誠可嘉著送至大將軍簡親王軍前
酌給割付令其招撫餘賊○撫蠻滅寇將軍廣西巡撫傅宏烈奏

僞總兵左旌王定邦等投誠僞總兵史自安等獻城投誠參議道
劉曉招撫僞總兵李贄唐良等下部議敘○己卯吏部左侍郎董
安國以自陳革職兵部右侍郎孫光祀以自陳降三級調用○庚
辰遣官賑通州三河諸路災民瘞暴骸○揚威大將軍簡親王喇
布奏臣遣將軍穆占於本月初一日復新甯縣今與大將軍安親
王岳樂剋期進剿武岡逆賊 上諭屯聚新甯賊寇已遁走武岡
簡親王等速總大兵卽會合安親王等兵克復武岡楓木嶺諸處
以定靖沅其由鎮遠進平雲貴應行事宜確議以聞儻逆賊不支
屢致遁逃安親王等乘其無措隨行追躡以期蕩平如賊由武岡
遁去烏喇甯古塔之兵可遣還京師○定遠平寇大將軍安親王
岳樂奏賊首吳國貴盤踞武岡率僞將軍胡國柱等以餘賊二萬
逆戰隘口將軍侯林興珠提督趙國祚等率兵奮擊大敗之吳國

貴中礮死餘賊棄武岡遁貝子章泰等復率兵追及於木瓜橋又大敗之遂復武岡州城及楓木嶺得旨嘉獎下部議敘○予故左都御史穆臣祭葬○癸未轉薩穆哈爲戶部左侍郎以達都爲戶部右侍郎原任○丙戌給事中姚締虞奏科道乃朝廷耳目之官原期知無不言有聞則告已故憲臣艾元徵有請禁風聞條奏從此言官氣靡中外無顧忌矣試觀世祖章皇帝時諸臣奏議何如鯁直卽未禁風聞以前諸臣奏議亦猶有可觀伏乞敕下在廷諸臣會議嗣後如有矢志忠誠指斥奸佞者卽少差謬亦賜矜全如或快己恩讐受人指使者縱彈劾得實亦難免於徇私之罪如此則言官有所顧忌而不敢妄言中外諸臣有所顧忌而不敢妄爲矣得旨九卿詹事科道會同確議具奏○丁亥予故平寇將軍原任兵部尚書科爾科代祭葬○戊子諭九卿詹事科道自古設立

臺省原係朝廷耳目之官上之則匡過陳善下之則激濁揚清務期知無不言言無不盡乃稱厥職近見直言讜論者不過幾人徇私好名者不可勝數朕自臨御以來略知此情每期言路諸臣化其偏私實陳得失輔登上理頃有以風聞言事請者試約略論之如今之章奏已見施行者雖不明言爲風聞何嘗不是風聞今若開風聞之條使言事者果能奉公無私知之既確見之當理卽當敷陳何必名爲風聞方入告也儻生事之小人恃爲可以風聞但徇己之好惡必致擅作威福以行其私彼言之者既無確見聽之者安能問其是非故曰無稽之言勿聽弗詢之謀勿庸正所以誠言之無據謀之自專也况天下之大臣民之衆導之以理曉之以法待臣下須寬仁有容不因細事而卽黜之所以體羣臣也用人則隨才器使無求全責備之心蓋以人材有不齊也若關天下之

重朋黨徇私之情皆國家可參可言之大事不但科道而已有志之臣民概可以言之何在區區風聞之言能斂戢奸貪之志氣哉治國家者在有治人不患無治法爾○己丑諭大學士等自古帝王治天下之道因革損益期於盡善原無數百年不敝之法果屬不可行者自應參酌事宜歸於可久至於制度既定事可遵行不宜議論紛紜朝更夕改近閱奏章亦有不思事之可否但欲徒爲更張或粗識數字卽爲大言準之事理殊屬茫昧如逞空言無補實用其誰不能且明末一切事例游移不定上無道揆下無法守以致淪亡此皆爾等所親見亦眾所共知今後凡條奏本章爾大學士等務加詳酌○諭議政王大臣等今我大兵數路並進深入勦賊轉運糧餉殊爲重要聞今歲湖南亢旱所運糧餉一時不前殆未可定令學士佛倫侍郎金鉉並遴選部院賢能官員前往湖

廣同督撫商酌總理諸路大兵糧餉○靖逆將軍甘肅提督侯張
勇奏噶爾丹遣其寨桑莽奈致書於臣云我向欲通使因地方有
事未暇今特遣人獻馬三匹貂裘一襲又云西北一帶地方皆得
之矣惟西海向係我祖與伊祖同奪取者今伊等獨據之欲往索
取因係將軍所轄之地不敢輕舉臣念彼遠餽受其裘馬厚賞來
使而遣之前此噶爾丹曾遣人調集甘州南山一帶番目赴西套
臣因遴選通事密探噶爾丹年紀性情並與兵往侵西海之故歸
復云噶爾丹申年所生年三十六歲爲人兇惡耽於酒色去歲舉
兵欲侵西海行十一日撤歸今夏又兩次出兵至纏頭回子之地
而還見近邊諸將統兵駐紮不敢輕犯臣查近者入邊行劫皆係
噶爾丹擊敗來奔貧無所依之人詳視噶爾丹情形尙無興兵之
舉河西地方似無可慮謹將噶爾丹原書一併呈覽奏入命檄知

大將軍圖海○庚寅撫遠大將軍都統大學士公圖海奏進取漢中興安兵分爲四路臣與將軍佛尼勒等由興安進總兵官程福亮爲後援駐守舊縣關諸處將軍畢力克圖提督孫思克等由略陽進西甯總兵官朱衣客爲後援駐守西河諸處將軍王進寶漢中總兵官費雅達等由棧道進延綏總兵官高孟爲後援駐守寶雞甯夏提督趙良棟由徽州之巴都山進臣等於九月初八日四路並發奏入 上諭今將軍莽依圖等大敗逆賊吳世琮平定粵西進取雲貴大將軍安親王恢復武岡州楓木嶺擊殺賊渠吳國貴大將軍貝勒察尼由常德進取辰州將軍噶爾漢等自鄖陽進取興安宜乘賊處處敗衄逃遁震動之時分路撲滅大將軍公圖海亟統大兵乘機剿滅漢中諸處賊寇速定四川如賊敗走卽亟躡其後直搗窮追勿使占踞險要○辛卯召滿漢九卿詹事科道

等官集中左門 上先召吏部侍郎哲爾肯屯泰至內殿諭曰朕親決淺務十年餘矣科道爲朝廷耳目之官每覽奏疏實能爲國有裨政事者甚少草率塞責者甚多爾可傳諭九卿各官並將朕諭旨宣示少頃進見朕將面詢得失各據所懷直陳勿隱哲爾肯屯泰出至中左門向各官先宣 口諭訖隨讀 上諭曰今將科道兩衙門本章情弊無益國計民生之處一一講究卿等必有至公之眾論以佐朕意卿等但有所見卽直言不可隱諱卽如科道條陳一事部議准行又有科道官言其不可者今日之所謂是明日又轉而爲非朝更夕改茫無成憲難取信於天下豈治道至理哉姑舉其大概如舉才能一事是因人材不一有能理繁者有有操守者有練習其事者自古選賢任能爲治之大道與論俸不同其法未嘗不善卽 世祖章皇帝時亦曾有諭常行選擇之條偶

有徇私作弊之人將不肖寡廉者薦之因一人而其法遂壞自朕親政以來如鹽差關差數行更換以後條陳不知又改幾次也又如戶部銷算錢糧一事因督撫所報不合時價故部議駁回而科道輒有言者以爲督撫地方大臣斷無虛估價值肥己行私凡有銷算皆不應駁查及部議徑准督撫之銷算不行再駁則科道又以督撫冒銷錢糧一束草原價若干開銷若干一石豆原價若干開銷若干不特草豆爲然凡馬匹等項事事皆有虛冒部中不行詳查概聽督撫開銷以徇情面由此觀之部議不行駁回則以爲徇督撫之私情駁回則以爲督撫地方大臣不宜疑其有所私冒又恐衙役往來騷擾生事或應駁不應駁何者爲是兩說俱無定論是皆大者餘難悉述今日而諭尙有未盡之言故先以上諭使曉朕意隨命九卿詹事科道各官至御榻前上問曰科臣姚

締虞所奏風聞言事疏爾等如何定議吏部尚書郝惟訥戶部尚書梁清標等奏言官奏事原不禁其風聞但風聞參奏審問全虛者定有處分之例今若不加處分恐有借稱風聞挾私報怨者亦未可定仍應照定例行兵部尚書郭四海左都御史魏象樞戶部侍郎田六喜等奏見行例科道奏事全虛者處分一款得實者卽免議人人原可盡言但要虛公體訪不宜又開風聞之例 上顧科道諸臣問曰風聞言事爾等以爲可行否如有欲言可悉陳奏吏科掌印給事中李宗孔禮科掌印給事中余國柱等奏言官風聞言事 皇上原未禁止但徑開風聞之例恐有未便 上曰此係明末陋習若此例一開恐有不肖言官借端挾制罔上行私顛倒是非誣害良善等弊 上問姚締虞曰爾云言官風聞言事爾意如何姚締虞奏 皇上從不會處分言官但有處分條例在言

官皆生畏懼

上曰人臣爲國不擇利害有志之士雖死不畏况

降級乎爾等皆以風聞爲言朕亦何曾無風聞姑舉一二端言之

君臣分義休戚相關當吳逆初叛時諸臣中有一聞變亂卽遣妻

子回原籍者此屬何心視國如家之誼當如是耶又有占人田土

受人賄賂徇情行私大爲不法者爾言官何曾一言參奏言官奏

事宜將國家重大事務確加敷陳今爾等所言多舉細事無關治

要嗣後慎勿草率塞責如有大奸大貪參劾得實朕法在必行決

不姑貸 上又諭曰滿漢論事往往不能和衷漢官每謂滿官偏

執若漢官肯實心爲公據理辨論滿官豈有不從之理若滿官堅

意偏執漢官卽當奏聞 上又諭曰從來有治人無治法爲政全

在得人人臣事君全在辨心術之公私今爾諸臣之才皆能料理

政務但徇私利己者多公忠爲國者少若諸臣肯洗心滌慮公爾

忘私國爾忘家和衷協恭實盡職業庶務何患不就理國家何患不治平哉爾諸臣其勉之○調楊永甯爲吏部左侍郎

由兵部調

○是月免山東莒州江南徐州等十州縣旱災賦

九月甲午安塘筆帖式報大將軍貝勒察尼遣署前鋒統領蘇虎濟偵視辰龍關賊勢蘇虎濟還言辰龍關路徑堙塞甚固賊與民一無所見河渠畢涸大兵不可立營 上諭今賊勢大敗正在摧破凡爲將軍大臣者各宜盡心效力乘賊無措卽行追勦速靖地方武岡州楓木嶺係辰龍關後路逆賊必自震動貝勒察尼等遣蘇虎濟偵視蘇虎濟不探聽賊中確音據報賊與民一無所見復云大兵不能立營規避退縮殊爲不合貝勒察尼等其速取辰龍關前至鎮遠與大將軍安親王等兵會共議進定雲貴事宜以聞

○戊戌以李本晟爲浙江巡撫

由大理寺卿遷

○庚子涼州提督孫思克

奏漢中興安未便進取 上諭議政王大臣等孫思克奏稱賊多
步行踰嶺登山如履平地小路曲徑賊所稔知我兵前進恐賊由
紆徑潛躡我後以絕餉道爲害滋甚朕思秦地綠旗之兵爲數甚
多其中步兵不少且各省綠旗兵向推秦兵精銳賊能跋涉山嶺
我兵豢養有年何獨不能况漢中興安秦省內地滿漢大兵徑行
熟悉何得視同絕域輒妄誕其辭凡將帥用兵前進衝鋒後顧餉
道務詳度以合機宜乃一定之道也儻以賊間道潛來斷絕餉道
爲憂怯懦不前則永無破賊之日矣又奏言大將軍公圖海分滿
漢兵爲四路雖分賊勢終憂兵單綠旗兵每人止有一馬且未必
皆強壯可用之兵惟滿洲大兵堪任第爲數無多雖欲另調又恐
秦地三邊番夷甚眾當此秋高馬肥思逞之後實無兵可調不若
俟來春二三月間塞外草尙未生水泉猶涸之時多調邊兵以資

戰守各路進發朕思秦中滿兵不少綠旗兵較各省更多今稱兵力單弱顯屬畏縮憚於進兵且各省綠旗兵亦止一馬會無多給而且越境征勦粵東粵西閩楚諸處今又進定滇黔較之平定境內漢興勞逸何如耶向者凡將軍提鎮官募兵時必選精壯勿使濫收充數定例嚴明今若以秦兵皆非強壯難以應用則孫思克職任何事觀此則欺蔽之情更顯然矣且有太將軍公圖海在彼乃妄議大兵多寡殊屬狂妄又云番夷馬肥思逞欲俟來春二三月間草尚未生水泉猶涸之時進取設或二三月間進取之後四月間番夷馬肥思逞將若之何正值秋成涼爽各處賊寇大敗震驚之餘不速行蕩平反欲於來春青黃不接之時進取是又何意耶又奏稱秦省大半皆山地瘠民貧不產秔稻所種惟麥豆之屬向有捐納一事稍裨用兵今例已停罷民受採買之苦且山路

險阻必資負戴馱運其雇賃之價數倍於應輸之賦今各路需餉甚多山徑狹隘輓運維艱時當初冬草枯葉落畜牧無資欲俟春調集官兵務期兵強糧足共圖進取者職此之故朕思粵東粵西諸省山嶺亦多何曾豫備糧餉官兵豈有止食稻米不食他粟之理至於捐納各省俱停止留粵西事例以資平滇軍需之用自定秦省數年以來未曾勞民轉運且漢興雖多險阻乃陝西內地非隔省百姓轉輸可比今恐輓運累民至春又誰爲轉送耶當逆賊敗遁之時急令進兵者正爲早定地方以安百姓耳採買恐累於民巡撫杭愛題奏已經改定今以請開事例轉運維艱爲辭其規避進兵明甚又奏稱八旗出征官兵今年七月二十八日京師地震房屋傾壞歷斃人命聞之各懷內顧之憂臣所以暫停進取以回天意俟人心稍定再議進兵未晚朕思八旗官兵世受豢養

朕之加意臣僚士卒尤爲渥厚不特房屋傾圮細故卽赴湯蹈火
誼亦難辭孫思克封疆大臣凡事不加詳察妄言人情皆動以惑
軍心殊失大臣之體細察孫思克奏內前後情由惟耽安逸怯於
進兵列款巧奏且自秦省有事孫思克等係封疆大臣俱應按律
議處念同大兵進剿宥過計功給以世襲之官加以不次之擢當
捐軀報國破賊安疆自請前進效力乃孫思克身任提督統轄全
師不思奮力前進反煽惑滿漢搖動民心飾辭妄奏深負朕擢用
之恩情罪殊屬可惡其令翰林學士喇沙里速往嚴取口供來奏
尋喇沙里取供還奏 上曰孫思克理應嚴察治罪但今方統兵
與大兵分路進剿俟事平日再議○辛丑諭護軍統領吳丹近者
廣西南甯賊將吳世琮被誅湖南武岡州吳國貴亦已投首廣西
湖南俱經投誠賊意懈弛賊兵潰散天下之人咸知賊勢必敗罔

不引領望諸將軍早靖逆氛爾等陝西將士駐紮善地馬無傷斃
人無疾病不思速滅賊寇枝梧推諉進取無期又有何人代爲爾
等破賊耶爾在朕左右稔知朕意應勇果任事參贊大將軍機宜
以立功勳頃大將軍奏言來京陛見面奏軍國大事比至陳奏並
無成算有失眾望此固軍前將士所悉知也若失此機會可乘之
時萬一賊據四川貴州雲南以爲巢穴致歲月相持彼時悔無及
矣宜速行籌畫○丙午諭刑部國家設立法制原以禁暴止奸安
全良善故律例繁簡因時制宜總期合於古帝王欽恤民命之意
向因人心滋僞輕視法網及強暴之徒陵虐小民故於定律之外
復嚴設條例俾其畏而知儆免罹刑辟乃近來犯法者多而奸宄
未見少止人命關繫重大朕心深用惻然其定律之外所有條例
如罪不至死而新例議死或情罪原輕而新例過嚴者應去應存

著九卿詹事科道會同詳加酌定確議具奏○鎮南將軍莽依圖奏靖南王下都統馬九玉等所屬官兵遣令平定廣西自至臣軍以來管副將事王承業管參將事李雲曹應鵠張朝瑞童茂等舉首逆賊吳世琮書札且擊殺賊寇救援南甯得彼之力爲多進剿雲南時儻不攜若屬以往則如此整練精兵得之甚難但彼等俱未給有定銜指有定缺恐或不能實心奮力請量給官職並都統馬九玉酌量鼓勵庶深入剿殺實爲有濟 上命議政王貝勒大臣等集議尋議政王大臣等議覆王承業等隨大兵進剿廣西逆賊著有勞績宜將五營官兵設爲援剿營王承業李雲曹應鵠張朝瑞俱授爲副將童茂授爲參將其所屬官員俟該將軍具題到日聽兵部議覆都統馬九玉係旗下官員俟敘滿洲官員之日一併議敘得旨馬九玉自閩中以至兩粵同大兵效力可嘉著加太

子少保餘依議○庚戌 上以地震率王大臣詣 天壇祈禱○
辛亥命簡親王喇布率師守桂林莽依圖進師雲南○壬子工部
議覆河道總督靳輔奏請將南旺夏鎮北河分司分管諸務俱歸
濟甯道兼轄從之○甲寅諭大學士等朕每日聽政一切折出票
籤應商酌者皆國家切要政務得失所繫今後起居注官除照常
記注外遇有折本啟奏俱令侍班記注惟會議機密事情及召諸
臣近前口諭記注官不必侍班○廣東廣西總督金光祖奏官兵
分路搜山於八月十七日擒獲祖澤清並其子祖良棟 上諭逆
渠祖澤清背負國恩屢行反叛情罪重大命平南王總督巡撫遣
官械送祖澤清父子及家人來京○丁巳以于成龍爲福建布政
使由按察使遷○是月免江南宿遷前年水災額賦

冬十月癸亥予故刑部尚書劉槩祭葬諡端敏○湖南巡撫張朝

珍甘肅巡撫巴錫遵諭自陳吏部察議俱擬降調 上曰督撫係

封疆大臣凡有旨下部院察議者爾等務將其人事迹據實詳察
若爾等真見爲堪用之人卽應舉出奏明至各省舉劾官員亦應
據實詳察若有真見爲循良者亦卽指實奏明傳諭滿漢諸臣知
之張朝珍巴錫俱著留任○諭兵部內大臣坤巴圖魯侍衛都統
畢力克圖侍衛覺和託等出師日久年已衰邁不能馳驅左都御
史舒恕患病果真此等實係衰病大臣官員可察明撤還京師至
副都統博濟等兵見駐南雄今南雄已爲內地博濟甫往未經效
力且大將軍簡親王兵少博濟可率其眾前赴廣西吉安所駐滿
兵亦令前赴大將軍安親王軍前如有非要地而駐兵者俱察遣
用兵所在俾之進剿可移文諸路大將軍將軍等各案所部列名
以聞大臣官員稱病留止城邑者亦令察明具奏尋大將軍圖海

奏坤巴圖魯侍衛覺和托二人遵旨令其還京師外臣於十月初

二日四路並進已近賊境畢力克圖別率一軍亦由略陽一路進

偪賊境或仍撤彼還京或俟恢復漢中興安之日遣還伏候 睿

裁得旨畢力克圖俟恢復漢中興安之日遣還京師○丙寅以李

仙根爲左副都御史

由鴻臚寺卿遷

○戶部等衙門會議錢法十二條一

順治錢初重一錢復改鑄重一錢二分五釐又改鑄重一錢四分

今應仍鑄一錢四分行使二因銅少以致錢貴查鹽課與關差一

體應將兩淮兩浙長蘆河東課銀俱交見出差御史督各運司官

照部定價買銅解送三關差官員所辦銅斤應買廢錢舊器皿等

銅解送或將紅銅六十斤鉛四十斤折作銅一百斤解送不許解

送毀化板塊之銅如此則無毀錢之弊四關差官員買銅應慎選

殷實老成人役買辦五寶泉寶源二局鑪頭匠役包攬買交者枷

責並妻子流向陽堡官員徇庇者革職六各關官員差滿回部所欠銅斤應嚴立限期限內不完者革職所欠銅斤變產追完辦銅人役仍照前定例治罪七查戶部寶泉局有滿漢侍郎管理今亦應令滿漢侍郎親身帶領監督等公同秤收發鑄八開採銅鉛凡一切有銅及白黑鉛處所有民具呈願採該地方督撫卽選委員監管採取九查定例凡民間必用之銅器五斤以下者仍許造賣外其非必用之器不許製造應再行嚴禁照例治罪十化錢爲銅已經禁止定有處分之例未定有鼓勵擊獲之例嗣後有出首擊獲者審實將所獲之銅一半入官一半給賞十一京城錢少價貴應頒發制錢式樣行令各省巡撫鼓鑄十二寶泉寶源二局土砂煤炭灰內有滴流之銅應專差官會同該監督召人淘取所得淘取之銅照部定價收買從之○戊辰賑鳳陽臨淮饑○鎮安將

軍噶爾漢等奏臣等率兵至白河縣偵知前路山徑狹隘馬匹難行因復商酌簡選兵馬從上津路進發 上諭將軍噶爾漢總督楊茂勳提督佟國瑤身臨賊境深知其地險要可從上津一路進師視陝西大臣進剿之會與大將軍公圖海等夾攻興安賊寇迅復疆土可移咨圖海知之○己巳諭大學士等朕比見中外章奏尤長非徒浮泛無益且令閱者厭倦又見直隸各省奏讞獄詞其中多改飾口供未必皆得情實朕愛惜生民惟恐一夫有傷自吳逆叛亂以來命將出師慮其在外騷擾莫不諄切告誡前歲江西大軍擄掠民間朕殊爲痛恨嗣後嚴加飭諭聞諸路禁軍已無敢蹈前轍矣○辛未賜羅淇等一百一人武進士及第出身有差○遣內閣學士希佛郎中倭黑齋敕往陝西諭將軍張勇王進寶提督趙良棟孫思克曰自逆賊吳三桂背恩反叛遣發大兵各路征

勦平定疆宇撲滅賊寇湖南廣西福建諸處以次恢復餘賊逃潰盤踞水陸險隘冀圖抗拒此等殘寇雖無煩速勦不久自當殄滅但朕軫念民生急於拯救令其得所故欲掃除餘孽以靖土宇今賊既敗遁負險無容專恃馬兵若用綠旗步兵之力於滅賊殊爲有濟况我綠旗兵較之賊兵甚強爾等素受國家厚恩勦力行間樹績邊疆甚多殫矢忠貞圖報恩眷朕所悉知爾當各率所屬綠旗兵平定漢中興安恢復四川宜分幾道進兵作何調度始能恢復其詳議具奏如爾盡力報效恢定漢中四川朕必不拘成例優與加恩爾等官兵前進則滿洲大兵亦卽相繼進勦接運糧餉不致匱乏茲事所繫甚爲重大速詳加酌定以聞又令希佛等傳諭張勇等曰自古漢人逆亂亦惟以漢兵勦平彼時豈有滿兵助戰哉今逆賊大敗乘此逃散之際理宜速定四川天下綠旗兵無如

陝西強壯而其數較各省倍眾在陝西大臣官員又皆具有才能將滅之寇何難剿除爾等不卽平定四川豈緣爾等名位事權輕歟儻謂地屬險隘自古以來險隘之地若不攻取豈有自定之理作何調度官兵幾路進剿事宜確議以聞又遣給事中莫羅等齎敕赴廣西其敕諭與諭陝西諸將大指略同○左都御史魏象樞奏舉清廉十人原任戶部侍郎雷虎原任戶部侍郎班迪原任兵部督捕侍郎達哈他原任刑部侍郎高珩原任大理寺卿胡密色原任吏部郎中內升宋文運原任國史院侍讀蕭惟豫原任湖廣布政使未任告病畢振姬原任直隸內黃縣降調知縣張沐原任江南嘉定縣革職知縣陸隴其得旨雷虎朕亦素聞其清因補授戶部侍郎凡事偷安督修孝陵又造冊不明革退今旣經魏象樞特薦著授爲內閣學士兼禮部侍郎班迪爲戶部侍郎聞其清

慎因差往江西審事不明降級令其隨旗上朝非係未悉其人餘下所司詳議○癸酉諭大學士等逆黨吳應麒夏國相等俱吳三桂族戚同謀叛逆本非脅從今招撫敕書中若加脅從等字反令生疑不如聲明其罪許以革面歸誠王者之言昭如星日一以至誠相感庶可招徠遠人若王屏藩傾心向化則西蜀不血刃而定矣其中有二大事關繫最要如賊黨中有素受吳逆厚恩不忍加害其孫能幡然悔悟挈之來歸者非惟免罪且當敘功又有心切歸誠繫念妻子在滇不忍分割者許其一面密通聲息一面撤兵回滇潛爲內應功成之後一併議敘庶可速其來歸耳爾等卽以此意撰擬○甲戌冊封嬪吳雅氏爲 德嬪○丙子廣西提督折爾肯奏泗城土知府岑繼祿歸誠○長沙陣亡將士喪至遣侍衛奠之○丁丑吏部議覆奉天府府尹梁拱宸奏奉天所屬一府二

州七縣正印佐貳雜職等官三十餘員有劾無舉恐賢能者不知所勸應照直隸各省之例遇薦舉之年酌薦一員從之○戶部議覆奉天府府尹梁拱宸奏奉天錦州等處旗下荒地甚多民欲耕種旗下指爲圈地如檔冊未經圈給而妄稱爲圈地者察出從重治罪應如所請將被圈之地概行查明除旗下額地之外俱退與州縣官員勸民墾種得旨旗下額地之外其餘未墾之地著嚴加詳察具奏○己卯廣東提督侯襲曾奏海逆盤踞井洲諸島臣與潮州鎮臣馬三奇等率兵水陸夾擊攻破井洲島焚燒賊船賊巢斬殺甚多生擒僞參將等員獲器械僞札無算下部議敘○撫轡滅寇將軍廣西巡撫傅宏烈奏粵西進雲貴有二道一由南甯將軍莽依圖已遵旨統滿漢大兵前進臣願親率官兵由慶遠一路直取雲貴 上諭粵西初經恢復傅宏烈仍駐會城同理事官麻

勒吉等平定境土撫綏百姓供應大兵糧餉其傅宏烈標下官兵
可選精銳聽王與將軍進剿調用○庚辰免湖北康熙十三年至
十七年賦○辛巳增五城流民賑濟銀米○壬午靖逆將軍甘肅
提督侯張勇奏時屆嚴冬堅冰載路轉餉維艱祈暫止陝西兵進
征漢中興安及進取荊州常德衡州永州廣西諸路兵馬俟明春
再行齊發 上曰近閱大將軍公圖海奏分兵四路進取漢中興
安而諸路大將軍各領大兵相機剿賊平定疆圉將軍侯張勇所
請不准行○諭議政王大臣等背恩反叛之罪在吳三桂其吳應
麒胡國柱等咸係附和之人今雖諸路賊寇敗遁破滅在卽朕俯
念黎民早欲使疆圉平定其吳應麒胡國柱夏國相王屏藩馬寶
郭壯圖各書敕一道分發各路大將軍將軍總督提督巡撫等招
撫敕曰諭王屏藩胡國柱馬寶郭壯圖夏國相吳應麒爾等本係

吳三桂藩下之人會授世職當吳三桂反叛時爾等率同逆黨抗拒大兵其後力窮敗遁今復竊踞一隅遲回觀望荼毒生民茲湖南廣西漢中俱經底定賊勢摧敗殄滅可期爾等所明知也每念滇黔皆朕赤子久罹兵燹不得早見太平朕心殊爲惻惻今特降專敕詳加開諭爾等若悔罪歸誠其從前抗拒之罪悉爲赦免仍論功敘錄至爾等標下將士如同心歸正亦概從寬宥酌量加恩但念繫戀父母妻子人之常情或因父母妻子尚在滇黔心懷瞻顧爾等皆掌握兵柄之人非微末將弁若卽率所部兵徑還雲南誰能阻遏一路先退諸路亦必相率遁逃誰能自立大兵到日相機接應不特保全家口亦可建立功名或能開導吳世璠共來歸順厥功尤懋煌煌諭旨炳如星日朕不食言近日歸正各員朕皆赦其前罪論功錄用亦爾等所知爾等其盡釋疑衷勉圖後效以

副朕懷遠矜全至意又諭兵部今茲招撫與往者不同因彼情實昭然故特頒敕書令各大將軍將軍加意曉諭以革其心勿得視為泛常○癸未福建總督姚啟聖奏雙頭洞係浙閩交界賊首陳起萬等嘯聚臣會同提臣楊捷撫臣吳興祚於五月初九日至流江地方水陸夾擊大敗賊眾殺傷無數獲其船隻器械下部議敘○轉焦毓瑞為兵部左侍郎以項景襄為兵部右侍郎由內閣學士遷○甲申兵部議覆奉命大將軍康親王傑書請題參將會承補授興化總兵上曰總兵封疆要職自當遴選總督既未列名豈可遽將參將超補況地方漸次平定必須遴選得人庶不至貽誤軍機也○諭奉命大將軍康親王傑書曰自數年用兵以來所費錢糧不貲以致民力疲困今大破湖南賊寇餘孽遁入雲貴扼據險要抵死支持其勢旦夕殄滅惟福建海賊竊踞海澄倚廈門金門為

營窟騎兵無所用其力惟藉水師樓櫓攻取甚屬緊要王等會言
今歲荷蘭國船若到於八月內進攻海寇儻荷蘭國船愆期當內
徙邊海人民堅壁清野以待其困今歲因荷蘭國之船未至故前
議不行近者福建綠旗兵丁較取廈門金門時漸增數倍卽滿
兵止以綠旗兵丁剿滅賊寇未爲不足見在福建滿兵甚多應卽
撤一半以省糧餉以甦民困但耿精忠尙在閩中虞有意外之變
故暫爲停止朕思卽令耿精忠來京此輩惶恐疑畏或生他故如
留耿精忠在彼王親率滿兵一半回京似屬不可設必候諸處底
定則福建需用糧餉較之他省不啻什百爲今之計王當開諭耿
精忠令其陳奏請安詣京陛見儻耿精忠因王之言具奏止可令
其自來若耿精忠未能卽行王獨率滿兵一半先回則勢更有所
不可也此事關繫甚爲重大王當詳細籌畫具奏○乙酉以張所

志爲福建按察使

由山西冀甯道遷

○戊子先是吏戶兵刑四部會議私

採人濫條例請旨

上曰採濫本以養人定例過嚴則無知小民

動罹法網反致傷生其令議政王大臣九卿詹事科道會同詳議

以聞至是議政王大臣等議爲首者絞爲從者枷責 上曰邇來

採濫必越佛阿喇地方較前稍遠是以價日貴而盜者愈多不若

令佛阿喇駐防官兵中途察緝則法不待嚴而弊自可絕矣○吏

部議覆左都御史魏象樞舉清廉一疏查原任侍郎雷虎班迪已

經奉旨無庸議外原任督捕侍郎達哈他京察降級原任大理寺

卿胡密色京察革職隨旗上朝俱無庸議原任刑部侍郎高珩原

任吏部郎中內升未補宋文運俱告假回籍應移咨該撫給文赴

部候補原任國史院侍讀蕭惟豫終養回籍俟伊事完之日該撫

給文赴部候補原任湖廣布政使畢振姬年老告病回籍無庸議

原任內黃知縣張沐降調回籍原任嘉定知縣陸隴其革職回籍俱移咨該撫給文赴部補用得旨依議補用原任知縣張沐陸隴其係保舉廉能之員如直隸清苑江南無錫等縣最稱繁劇難治必用之此等地方庶其才可以表見○以高珩爲刑部右侍郎原任

○于湖廣陣亡遊擊杜英佟大年守備韓璽聖于守印化嘉誥等官有差○奮威將軍平涼提督王進寶奏臣率兵進取四川與賊戰於利橋紅花鋪諸處大敗之復鳳縣兩當縣得旨嘉獎下部議敘○己丑先是河道總督靳輔奏請於節省河工錢糧內動支銀十四萬餘兩另開運河於駱馬湖之旁以便挽運命九卿詹事科道會議至是九卿等議覆應如所請 上曰諸臣意見若何左都御史魏象樞奏曰河臣動用錢糧二百餘萬爲一勞永逸之計前奏隄壩已修築七分今又欲復開河道所爲一勞永逸者在臣

等恐將來漕運有阻故議從其請耳

上曰以朕揆之憲臣之言

爲是漕運關繫自應從其所請但河道雖開必上流浩瀚方免淤

滯今歲雨少水涸恐未必有濟卽目前河工告竣亦因天旱易修

豈得遽恃爲永固耶○庚寅除江西兵荒賦○陝西提督趙良棟

奏臣率領大軍由密樹關進取徽州復遣兵於黃渚關以牽賊勢

及抵密樹關連戰敗賊賊不能支遂棄徽州遁走恢復州城得旨

嘉獎下部議敘○奉命大將軍康親王傑書奏都統喇哈達遣副

都統倭申巴圖魯於十月二十六日進抵東石擊敗賊眾殺僞參

將林英擒僞總兵陳深等及賊兵一百六十三名下部議敘○辛

卯諭九卿詹事科道等邇來諸事爾等全不擔當或遇事有疑難

卽以未經與聞不同啟奏或託言他事及病不赴會議在部辦事

或推諉不肯列名或有過卽於司屬意圖僥倖若果應坐罪豈推

卸便可脫免乎又有臨事全無一語及既退之後輒云我會如此立論而某官不肯見從朝廷不會允此豈臣子靖共之道乎至部院衙門司官亦多儉安廢弛各堂官宜將此等司官指名題參九卿會議處有規避者著都察院及科道官糾參嗣後爾等當直據所見陳奏審酌可否自在於朕爾等勉之○是月免山西遼州文水壽陽雹災額賦

十一月壬辰朔以徐元文爲內閣學士

原任學士院學士

○諭大學士等內

閣與翰林官不妨互爲調用其行坐之處照進衙門先後以定次第○兩廣總督金光祖奏今自粵西進取雲貴雲貴督撫提督俱在湖南請於諸臣中酌分一二來粵以資彈壓 上諭雲南巡撫李天浴前往廣西同王將軍等進剿並撫定新復地方○癸巳命安徽巡撫徐國相親往盱眙滁州等五州縣賑濟饑民○乙未諭

議政王大臣等鄂爾多斯多羅郡王古魯當榆林總兵官遣使請

兵不及候旨卽調兵應援及聞神木變叛又卽遣其子統兵先行

嗣復力疾親往爲國效力撫降神木縣古魯可封和碩親王○丙

申奮威將軍平涼提督王進寶奏十月二十二日進兵武關三面

夾擊陣斬賊千餘人生擒僞總兵羅朝興等遂奪其關下部議敘

○戊戌以薛柱斗爲湖南布政使

由安徽按察使遷

○奮威將軍平涼提

督王進寶奏十月二十七日追剿賊眾入雞頭關抵漢中賊首王

屏藩引賊兵自青石關走廣元恢復漢中府復遣官兵追擊直抵

青石關得旨嘉獎下部議敘○庚子湖廣提督徐治都奏請調發

撫標官兵及武昌漢陽各營官兵進剿蜀寇 上諭將軍王進寶

統率官兵於棧道險峻之地屢敗賊寇直前恢復漢中逆賊王屏

藩所部之賊不及千入已經敗遁今當逆賊敗奔震動之時進定

四川最爲重要可如徐治都所請令巡撫張朝珍調標兵千人並武昌漢陽營兵一千二百人速行遣發如或稽延治巡撫以貽誤軍機之罪儻徐治都遲滯不進亦以貽誤軍機之罪罪之○陝西提督趙良棟奏臣帥兵敗賊於打火店王家臺追抵白水江賊對岸拒守十月二十五日臣師始渡江追擊賊眾過入堵山斬獲甚多二十七日抵略陽僞吳將軍等棄城遁恢復略陽但大將軍等三路官兵不知近遠而臣以一旅尾擊而前似已深入儻少遲延萬一蜀糧得至賊心一堅復出守險則再進甚難 上諭曩者大將軍圖海奏言親率將軍佛尼勒等由興安路進兵將軍畢力克圖提督孫思克等由略陽路進兵將軍王進寶等由棧道進兵提督趙良棟由徽州路進兵今王進寶擊敗棧道之賊直前恢復漢中趙良棟擊敗賊眾恢復徽州直抵略陽惟圖海畢力克圖等兩

路之師如何擊賊已抵何所迄今尙未有確報且畢力克圖等未至所指之地而趙良棟已抵略陽彼等所行者何事當此逆賊搖動之時圖海畢力克圖孫思克等可速統兵剿賊進定疆圍各路之兵宜令互通音問又王進寶趙良棟等統兵深入畢力克圖孫思克等應速以兵繼其後儻若遲緩不前致有隔絕卽以遲誤軍機之罪罪之○宣義將軍尙之孝奏大將軍康親王咨稱福建江西接壤之地尙有逆賊江機楊一豹擾害建甯邵武諸處令臣速進兵剿滅臣星夜至汀州整頓甲兵進剿 上諭尙之孝速先平建甯諸處之賊仍遵前旨率兵赴江西與總督巡撫提督等共商剿撫江西餘寇○辛丑諭戶部前者大兵進剿四川已破朝天等關直至保甯恢復在邇因周有德張德地席卜臣駐廣元不將糧餉極力轉送軍前陝西總督巡撫亦不將糧餉極力運送以致大

兵糧餉不繼難於久駐遂爾退回貽誤軍機關繫重大此數年以來使逆賊逋誅封疆未復兵民苦累休養無期皆周有德張德地席卜臣陝西總督巡撫怠玩遲延之故每念及此深可痛恨今大兵分路進取已恢復漢中不日前抵蜀疆相機勦撫底定可期軍前糧餉最爲緊要其令陝西督撫諸臣殫心經理設策輸運務使士馬飽騰捷音早奏以副朕定亂安民至意如督撫諸臣漫不經心泄泄從事致饋餉缺乏有誤軍機俱以軍法從事決不姑恕爾部速傳諭遵行○免廣東廣州肇慶二府康熙二十三年逋賦

○癸卯 上聞翰林院掌院學士喇沙里病故諭大學士等曰喇沙里侍從有年小心勤慎翻譯經書明白精詳咸稱朕意卽翰林諸臣亦皆稱其賢今一旦溘逝朕心惻惻隨遣一等侍衛對秦三等侍衛二格齋銀三百兩賜喇沙里之子三等侍衛俄爾濟圖仍

傳諭曰爾父喇沙里自任講官以來在內則經筵盡瘁在外則扈從勤勞會無一時一事少曠厥職居官勤慎內外諸臣罕有其匹方欲畀以大任倏聞奄逝不勝痛惜初不知病勢危篤未遣使視疾心甚悼焉念爾父家無餘貲賜銀三百兩爲治喪之費其議卹典禮俟禮部具題再加優給○甲辰諭議政王大臣等將軍王進寶副朕超擢顯用之意親統官兵冒險前進首先恢復漢中提督趙良棟亦副朕優擢之意親統官兵恢復徽州隨取略陽彼等皆報朕之恩實心效力今乘此破賊之勢卽恢復保甯平定四川亦有何難進取漢中各路官兵王進寶趙良棟等作何調遣前取保甯平定四川可詳加定議知會大將軍酌量而行大將軍公圖海率領大兵之半屯駐鳳翔防守陝西通省以護軍統領吳丹爲將軍率大兵之半繼王進寶趙良棟後務俾糧餉無或斷絕與總督

哈占等會議而行提督孫思克止率其所部兵駐防原守汎地湖
廣提督徐治都速統舟師乘茲勝勢沿江直取重慶將軍噶爾漢
總督楊茂勳提督佟國瑤等已進興安迄今尙未奏捷怯懦已甚
俟恢復興安之日噶爾漢等俱撤還原守地方前所有功績盡行
削去該部嚴察議處噶爾漢佟國瑤令防守鄖陽諸處楊茂勳率
所部官兵速自鄖陽啟行由荆門當陽迅至彝陵與徐治都直從
江路而進奮力平定四川以贖其罪○以麻爾圖爲陝西布政使
由按察使遷○裁浙江水師提督並提標中軍參將守備千把等員設
總兵官一鎮守黃巖○丙午奮威將軍平涼提督王進寶奏僞將
軍楊永祚僞總兵孫啟耀等投誠○庚戌福建總督姚啟聖奏臣
以進攻廈門金門等島酌撥兵一萬四千名赴水師提督萬正色
軍前第沿海諸汎地兵力單弱請召募新兵補額得旨進取廈門

金門諸處事關重要該督調發兵丁聽萬正色統領剋期破賊其所請募兵補額俟大將軍康親王題明滿兵應撤應留之處再議○王子諭議政王大臣等今將軍王進寶等率領官兵直入漢中諸處逆賊王屏藩等分道敗遁當此蜀賊震動之際速由重慶夔州進兵則恢復蜀省不難今湖廣船艦已成前雖有旨令提督徐治都等率舟師溯江而上直取重慶又令總督楊茂勳速往會徐治都協力進剿恐復觀望遲延亦未可知著差郎中蘇赫臣赴楊茂勳軍前趨兵速赴彝陵剋期前進並令與楊茂勳同行不時偵探軍情以聞○安南國王黎惟禎慶賀大捷奏言逆賊吳三桂變亂數年阻臣國入貢之路又屢差僞官多方脅誘令臣服從臣區區忠悃不敢從逆乃有本國逆臣莫元清背恩從賊與吳三桂密相締結領兵馬萬餘潛入臣國高平圖爲掩襲今幸仰仗 天威

滇南逆黨指日成擒臣請繕修貢儀一面遣陪臣赴京朝賀一面遣兵擒追逆黨莫元清明正其罪得旨著議政王大臣等會議尋議覆該國王不忘 皇恩竭盡忠誠不肯從逆今又慶賀進貢應交與禮部照安南國王進貢舊例遵行至該國王既稱莫元清投順逆賊差兵追擒應無庸議從之○甲寅陝西提督趙良棟奏臣攻取略陽隨發兵三路進剿數次擊敗賊眾共擒斬六千餘人恢復陽平關 上諭議政王大臣等陽平關逼近甯羌係入蜀之路沔縣亦與漢中相近今提督趙良棟恢復徽州直取略陽陽平關其意或欲進定四川儻不及與將軍王進寶等共議乘機徑往定蜀則滿洲大兵不可不爲後繼茲事最關重大其檄趣將軍吳丹偕總督哈占速統大兵爲進定四川官兵後應運致糧餉相繼不絕毋使軍機有誤○昭武將軍福建提督楊捷奏江西賊首僞都

督呂貴等率賊三千餘人犯崇汛建甯城守遊擊李英破賊於岑陽山悉殲其眾下部議敘○乙卯定遠平寇大將軍安親王岳樂奏臣等遵旨公議每佐領留十二人防守武岡州諸處其每佐領八人前鋒二百人護軍每佐領三人驍騎並漢軍每佐領五人俱行遣還令固山貝子章泰內大臣阿密達護軍統領桑遏署護軍統領伯郎肅輔國將軍宗室瓦山前鋒統領碩岱副都統伊巴漢署副都統穆森雅哈喇等率之而行其留守之兵令實授都統品級穆占等統領於是議政王大臣等議奏頃者大將軍貝勒察尼每佐領發回兵八人奉旨每佐領撤還六人今安親王軍前所有滿兵亦宜每佐領撤還六人大臣官員留者與發回者俱如王奏上諭安親王自統兵以來各處立功甚多隨往官兵亦多效力如王所題令其親率每佐領兵八人還京固山貝子章泰授爲定

遠平寇大將軍以王敕印留與章泰令章泰穆占同心協意商權而行但見在與賊對壘所撤之兵數雖不多初經底定投誠之兵甚眾乘此撤兵之時恐姦宄竊發亦未可定章泰等宜熟計防守其間有可行之機務乘時進取毋失事會○以王國泰爲江南安徽按察使由福建驛傳道遞○己未奉命大將軍康親王傑書奏靖南王耿精忠平南將軍都統賴塔等遣兵敗海寇於鰲頭山下部議敘○是月免山東鄒平等十州縣及長蘆地旱災賦

十二月壬戌朔先是湖廣總督蔡毓榮奏大兵進取辰龍關必由楓木嶺一路齊進請專責一人總統之至是議政王大臣等以蔡毓榮周有德二人請旨簡用上命蔡毓榮爲綏遠將軍賜敕諭曰大兵進剿雲貴各路綠旗官兵必須專責一人總轄調遣始克允濟特授爾爲綏遠將軍總督常德武岡等處所有各省調撥官

兵及湖廣全省綠旗兵馬聽爾酌量調度前進底定疆圉總督董衛國周有德提督桑峨趙賴周卜世俱聽爾節制商酌而行一切平定雲貴及勦撫事宜惟爾專責至楚中見任文職官員聽爾遴選賢能攜赴軍前調用如有能備芻糧克濟軍機及官兵有能首先奪關冒險直入擊敗賊眾者爾卽開列勞績具疏奏聞論功加等議敘如有臨陣退縮運糧違誤者副將知府以下各官卽以軍法從事其以上各官指名飛章參劾從重治罪水陸兵將不相習者爾卽具奏酌行更調爾定期進取恢復地方將破賊事宜密行知會廣西等處王將軍提督等齊乘機會而行爾須嚴督兵將相機前進力行勦除毋得遲延坐失時會仍嚴加偵探毋致疏虞大兵一到抗拒不順者戮之有先被賊脅從卽時迎降者俱免誅戮有能擒殺賊渠投誠者分別升賞須嚴禁兵將申明紀律經過地

方毋得騷擾百姓歸順良民加意撫恤爾膺茲重任宜據忠竭力

籌畫周詳勦撫兼施早奏膚功以副朕簡擢至意○癸亥以葉穆

濟爲陝西按察使

由郎中遷

○甲子

太和殿災肆赦○撫遠大將軍

都統大學士公圖海奏十月十五日臣等率大兵至鎮安縣探賊

在梁河關分路進勦令署理西安將軍事務佛尼勒等爲頭隊臣

親率護軍統領吳丹等爲二隊行至火神崖僞總兵王遇隆領兵

拒戰佛尼勒等滿漢官兵奮勇衝殺渡乾玉河奪取梁河關臣等

乘勝追勦僞將軍韓晉卿遁入四川臣等於十一月初二日至興

安州僞將軍謝四僞總兵王永世等並僞文武官共三百八十二

員兵丁一萬四千三百餘名至軍前投誠恢復興安州平利紫陽

石泉漢陰洵陽白河諸縣及湖廣竹山竹溪上津等縣得旨嘉獎

下部議敘又奏平逆將軍畢力克圖等於十月十四日復成縣僞

副將王光生率僞遊擊等官十九員兵丁三百六十名投誠參將
康調元等於十月二十九日復階州僞王將軍等敗走渡白水江
十一月十六日復文縣僞洮岷道王文衡率僞文武官迎降得旨
嘉獎下部議敘○乙丑 皇子允祺生○丙寅太監劉忠傳 太
皇太后旨諭領侍衛內大臣阿魯哈等曰皇帝自入秋以來未甚
爽健且此數年間種種憂勞心懷不暢頃者抱恙今雖痊愈尙未
甘飲食南苑潔靜宜暫往彼頤養阿魯哈等隨遵 懿旨奏聞
上曰 太皇太后念朕躬偶恙屢蒙降旨朕欽承 慈命明日幸
南苑 上召大學士等至懋勤殿諭曰君臣誼均一體勢分雖懸
而情意不隔安危欣戚無不可相告語者堂階之義固宜如是也
邇者朕體初平忽遇殿廷不戒被毀於火爾諸臣因朕偶恙復覩
此災愛主心切必謂朕當過於憂慮朕披閱經史頗明大道朕之

一身上受 祖宗之付託下繫臣民之瞻仰爲任匪輕甯不自愛
惟是今秋有地震之變又各處饑饉洊臻寇盜未息此朕早作夜
思中心惶懼寢食靡甯者至於殿廷告災乃 上天致警敢不夙
夜祇畏修省厥愆然其所關止屬朕躬臨御之所但得海宇清晏
置斯民於衽席之上則朕今所居較諸前代茅茨土階尙或過之
豈至以露處爲慮哉朕自五齡卽知讀書八齡踐阼統莅萬方

太皇太后嘗問朕何欲朕敬對曰臣無他欲惟願天下乂安生民
樂業共享太平之福而已當時左右實共聞之自茲迄今謹持此
心兢兢業業恒如一日可以質諸寤寐儻有政治失宜皆朕躬之
咎從不諉過臣下惓惓之意茲與爾等悉之爾等可傳諭九卿詹
事科道等官仍繕寫諭旨頒示各衙門○丁卯 上幸南苑行圍
○免福建海澄等十三縣被兵逋賦○己巳福建水師提督萬正

色奏新船雖竣舊船尚在督修且檄調諸路兵及礮手猶未悉至臣卽以新船配官兵先赴定海訓練俟舟師輟集定期水陸夾攻上諭江南總督阿席熙速選善用礮者二千人送該提督軍前福建總督姚啟聖等亦速遣士卒修整舟艦提督萬正色其嚴飭將士凡大兵所至務當撫綏被寇之人毋妄肆淫掠負朕恤民至意○庚午 上召侍郎達都問曰爾自福建來海寇形勢如何今歲有蕩平之機否達都奏曰臣來時廈門金門賊勢大挫賊船較前甚少聞海中糧米無從湊集賊不能久待不日可以底定 上曰今海禁已嚴賊糧何從而來達都奏曰賊所恃屯糧之處俱爲大兵所有惟向廣東高州海島稍稍竊運而已 上曰當賊置糧之際我大兵速取海澄等要害之處則賊失所憑依全閩地方可不久大定若謂賊勢較前已減姑俟相機徐圖則賊何時可盡滅

平夫師行既勞民力重困若能一舉滅賊地方速平則大兵無野
處之苦民困亦自此甦矣○辛未諭安親王爾率領林興珠來京
○癸酉福建水師提督萬正色奏臣標前後二營已設官兵尙餘
新募水師萬人請增置援剿左右前後四鎮各設總兵等官卽以
投誠總兵林賢等補授下議政王大臣等集議行○甲戌定遠平
寇大將軍安親王岳樂奏擒獲僞太子朱慈燦或在軍前正法或
解送京師 上諭朕曾以此事問之在內舊太監據云彼時朱慈
燦年甚小必不能逸出今安得尙存大約是假朕思歷年已久至
今始出自然近僞但事跡未明不便卽在軍前完結今王不日回
京可將朱慈燦帶來俟到日請旨定奪○撫蠻滅寇將軍廣西巡
撫傅宏烈奏先遣參將溫紹賢等從小路斷賊楓木嶺糧道請親
統官兵進剿 上諭應如所奏命傅宏烈親率所屬官兵恢復滇

黔諸處與大將軍平南王尙之信將軍莽依圖等協力同心酌量以行其粵西巡撫事務著麻勒吉署理○丙子 上問戶部尙書伊桑阿曰各省災荒共蠲免錢糧幾何伊桑阿奏曰見今所報江南等省約五十萬尙有數省未經報到 上曰被災省分若不蠲免錢糧民生可憫應將該省所報逐一查明使百姓獲沾實惠○戊寅 上還宮○庚辰 上以譚宏之叛或由迫脅所致令其姪前副將譚天敘齎敕往撫敕曰爾譚宏昔自蜀中率眾來歸優加侯爵久受國家豢養當吳三桂反叛之時爾被其迫脅爲賊固守抗拒有日茲者湖南廣西漢興諸處已經底定各路兵馬奮力齊進賊勢摧敗殄滅可期諒爾亦所悉知爾乃深達時命之人豈肯玉石俱焚朕念爾宿將舊勳夙沐厚恩必非甘心從逆特降專敕詳加開諭恐爾尙懷猶豫特遣爾姪副將譚天敘前往宣布朕意

爾若果能翻然悔悟棄逆效順爾之前罪俱行赦免仍優加敘錄
至爾標下將士如同心歸順亦一概寬宥酌量加恩若能獻地輸
誠厥功尤懋近日各處歸正人員朕皆赦其前罪論功錄用亦爾
所知爾其勉勵忠忱無懷疑懼以副朕矜宥保全至意○敕諭松
潘土司番民朕撫御寰區恒期中外臣民各得其所綏乂之懷遐
邇初無異視爾等俱係世守疆土之臣尤當鼓勵忠義報效朝廷
自吳三桂叛亂以來吳之茂盤踞松潘荼毒肆虐蹂躪地方困苦
已極念爾等皆係國家赤子今被其迫脅雖素懷忠藎莫能自伸
朕心深爲憫惻茲湖南廣西漢中興安諸處俱經底定各路兵馬
奮力齊進賊勢摧敗立見蕩平正爾等出離水火之日不宜坐失
機會今特降專敕詳加開諭爾果能感戴國恩倡義聯絡執擒吳
之茂以獻建功樹績朕卽優加敘錄寵以封爵撰給敕命以酬爾

勦庸大兵到日爾等若相機策應協同勦寇亦爾等之功爾等宜速乘時會早奏膚功以副朕懷遠矜全至意○壬午陝西提督趙良棟奏臣所屬兵勢單弱請調興安一路兵及副將楊三虎兵簡選進定四川 上諭平定四川事關重大其所請調興安進征之兵及楊三虎兵俱如所題調發提督趙良棟與將軍王進寶分兵兩路前進趙良棟授爲勇略將軍給之敕印不拘陝西通省及各處官兵凡係王進寶趙良棟兩將軍所調大將軍公圖海以身任之速爲遣發務至彼等所指之地勿致有誤若漫不經意調遣遲延恐誤進定四川重務○贈陝西陣亡守備杜進才官○甲申吏部請補科員 上曰近來科道官山東獨多何也科道爲耳目之官各省均用皆能周知地方利弊可令確議以聞○諭大學士等科道內升外轉關係勸懲在外道員職掌甚要科道外轉以道員

用殊爲太過應以在外小品官用五部郎中俸深者以道府兼升吏部司官外轉以道員用殊爲太過亦應以在外小品官用令九卿詹事會同議奏○命純親王隆禧子富爾祜倫襲爵○丙戌命孫思克官兵暫駐莊浪防守河東河西諸處○是月免直隸江南山東湖北河南等屬旱災額賦災甚者仍發粟賑之○免浙江黃巖等六縣旱災賦○是歲朝鮮琉球安南來貢○人丁戶口一千六百九十一萬四千二百五十六田地山蕩畦地五百十三萬六千三百五十三頃四十一畝徵銀二千二百一十三萬四千六十八兩八錢有奇米豆麥六百二十三萬一千四百六十一石五斗有奇草二百二十四萬二千六百一十九束茶十五萬五千三百六十五引行鹽三百九十五萬七千二百八十三引徵課銀二百三十九萬九千四百六十八兩有奇鑄錢二萬三千一百三十六

東華錄

康熙二十四

吳

萬五千三百有奇